



Arwain mewn gweddi

Llun: Sean Locke

Mae hi bob amser yn fraint cael arwain mewn gweddi yng nghynulleidfya'r saint yn yr addoliad cyhoeddus ar y Sul. Ond nid gorchwyl hawdd i rywun sy'n gorfod gwneud hyn yn gyson. Mae'n hawdd iawn mynd yn amherthnasol ac ailadroddus ac, o ganlyniad, nid oes neb mewn gwirionedd yn cydweddio â'r gweddiwr: sef un o'r rhesymau, mae'n siŵr, pam y ceir llai o weddio cyhoeddus mewn cyfarfodydd heddiw.

Dyma rai canllawiau sydd wedi bod o gymorth i mi yn fy ngweinidogaeth.

Dechreuwn yn gyntaf gyda rhai pwyntiau negyddol.

- Nid gweddi bersonol yw hi ond gweddi ar ran pawb sy'n bresennol ac felly rhaid cadw hynny mewn golwg bob amser yn y gwahanol rannau o'r weddi. Mae angen i'r gynulleidfa fedru cydweddio â'r gweddiwr.
- Yn ail, nid pregeth mohoni chwaith. Mae'n hawdd iawn defnyddio'r weddi i bregethu neu i wneud pwyntiau diwinyddol neu hyd yn oed efengylu. Rhaid cofio mai siarad â'n Tad nefol a wnawn ac nad oes angen ei atgoffa ef o'n diwinyddiaeth.
- Yn drydydd, dylid meddwl ychydig ymlaen llaw ynglŷn â strwythur y weddi – mae'n anodd iawn i gynulleidfa ddilyn os yw'r gweddiwr yn neidio'n aml i bob cyfeiriad.

Beth, felly, ddylai fod mewn gweddi gyhoeddus?

- Yn gyntaf, **addoliad**. Cyfarch Duw y Tad ar ran y gynulleidfa - ei ganmol a'i ddyrchafu ef a'i Fab Iesu Grist.

- Yn ail, **cyffes**. Nid cyffesu personol ond cyffesu'n gyffredinol bechodau'r eglwys.

- Yn drydydd, **diolchgarwch** i Dduw am ei fendithion tymhorol ac ysbrydol. Eto rhaid gwneud hyn mewn modd cyffredinol fel y gall pob aelod gydweddio â'r gweddiwr. Mae bendithion tymhorol yn golygu bendithion creadigaeth a rhagluniaeth Duw. Bendithion ysbrydol yw'r rhai sy'n dod trwy waith Crist a gweithgarwch yr Ysbryd Glân.

- Yn bedwerydd, **deisyfiadau**. Gweddio dros y rhai sy'n bresennol gyda'u hamrywiol anghenion ond eto yn gyffredinol. Sôn hefyd am faterion sy'n berthnasol i fywyd cyhoeddus yr eglwys - ei thystiolaeth a'i gweithgarwch. Yna'r gwaith cenhadol yng Nghymru a'r byd gan gofio wrth gwrs am yr eglwys erlidiedig. Yna gweddio dros yr awdurdodau a llywodraethau – sy'n golygu bod angen i'r gweddiwr wybod beth sydd wedi digwydd yn y byd yn ystod yr wythnos. Ac yna ar ben pob peth gweddio am adfywiad ysbrydol – ein hangen mwyaf yn y dyddiau sydd ohoni.

- Ac wedyn gorffen trwy **ddeisyf presenoldeb Duw** am weddill yr oedfa a'r diwrnod – gan orffen gydag **Amén!** cadarn.

Trwy ddilyn yr egwyddorion yma, bydd gweddi yn cael lle arwyddocaol yn oedfa'r Sul, gan fod yn fodd i ogoneddu Duw ac i annog ac adeiladu ei bobl.

Gwynn Williams

Mae Gwynn Williams yn weinidog ar Eglwys Efengylaidd Caerdydd